



Sanaziun da la via maistra tras Zernez – surdatta d’incumbenzas

Per pudair cumanzar a progettar la sanaziun da l’infrastructura illa via maistra tras Zernez sun gnüdas scrittas oura da prümavaira las lavurs. La suprastanza cumünala ha surdat las incumbenzas a las seguaintas firmas: indschegner dal s-chodamaint central a Torsten Hartmann, Bonaduz; indschegner da fabrica a Darnuzer Ingenieure AG, Tavo; indschegner per la part da la rait electrica e fibr’optica a la Repower AG, Bever. La progettaziun sco eir la sanaziun da la via maistra succeda in stretta collavuraziun cun l’uffizi da construcziun bassa dal Grischun, chi vuol dürant ils prossems ons sanar lur part da la via maistra tras cumün. Cun la prüm’etappa da la sanaziun es previs da cumanzar dal 2018.

Protecziun da las auas e funtanas

Il chantun Grischun pretenda dals cumüns chi gnia manada tras üna procedura da protecziun da las auas da fuond e da las funtanas (Quell- und Grundwasserschutzzonen). Las funtanas as rechattan per part sün terrain cumünal e per part sün terrain privat. La suprastanza ha surdat l’incumbenza per manar tras la procedura da protecziun al büro da geologia Mathias Merz a Scuol. Implü es gnü decis cha quista lavur dess gnir manada tras eir per las funtanas chi’s rechattan sün terrain privat dal medem perit. Il cumün orientescha als possessurs privats e coordinescha las lavurs.

Chasa da scoula – sanaziun ed ingrondimaint

Per la sanaziun e l’ingrondimaint da la chasa da scoula a Zernez han dürant l’inviern passà elavurà quatter teams lur propostas. Ils progets e resultats da quist stüdi d’ideas sun stats exposts principi mai illa chasa da scoula. Vendschader da quista concorrenza es il team FUTURA NOVA dal büro Brasser Architekten GmbH a Samedan. Els han uossa surgni l’incumbenza d’elavurar ün preproget ed üna stima da cuosts per la sanaziun e l’ingrondimaint da la chasa da scoula. La dumonda da credit correspondent a gnarà preschantada a la radunanza da preventiv 2018 la fin da quist on.

Contrat Burning Mountain

Dals 29 gün fin als 2 lügl ha lö per la settavla vouta il festival da Burning Mountain. Il contrat chi regla tuot ils detagls e las pretaisas davart dal cumün invers l’organisatur, es gnü approvà.

Contrat ESTM AG pel 2018

Il contrat pel marketing turistic tanter il Cumün da Zernez (per las fracziuns da Brail e Zernez) e la destinaziun turistica d’Engiadin’Ota valess amo fin la fin da l’on 2018. Causa il schogliment dal circol d’Engiadin’Ota ha eir stuvü gnir organisada da nouv la destinaziun turistica. La nouva società anonima ESTM AG, chi surpiglia in Engiadin’Ota il marketing turistic a partir dals 1. schner 2018, nun as partecpescha plü vi dals cuosts per l’organisaziun d’arrandschamaints locals. Our da quel motiv s’ha eir pel Cumün da Zernez stuvü laschar elavurar ün contrat nouv chi vala be per l’on 2018. Per l’on 2019 e seguaints vain lura tscherchada üna soluziun omogena pel marketing turistic da tuot las fracziuns dal Cumün da Zernez.

Institut Otalpin a Ftan

La radunanza extraordinaria da l’institut Otalpin a Ftan (HIF) ha decis la fin d’avrigl da far ün tagl da chapital cun redüer la valur nominala dal chapital d’acziun da chf 150.00 sün chf 25.00 pro aczia e d’augmantar il chapital d’acziun cun laschar segnar acziun novas. Quistas masüras sun gnüdas necessarias per pudair garantir inavant la gestiun da la scoula. Eir il Cumün da Zernez vess gnü la pussibilità da segnar acziun novas per avair darcheu listessa partecipaziun procentuala sco avant. La suprastanza cumünala ha decis cha’l Cumün da Zernez nu segna ingünas ulteriuras acziun ma cha’l HIF dessa gnir sustgnü inavant in pajond ils cuosts da gestiun annuals tenor la cunvegna da prestaziun sco fin qua ed a basa a la clav da scumpart actuala tanter ils cumüns da la Regiun Engiadina Bassa/Val Müstair.

Planisaziun d’areal Cul – proseguimaint stüdi infrastructura

La planisaziun d’areal Cul a Zernez es statta plü o main salda dürant ils ultims mais, quai impustüt causa chi s’ha vulgü spettar giò l’esit da l’elavuraziun da l’iniziativa dal pövel chi d’eira entrada la fin da gün 2016. l’l fratemp s’haja preparà üna documentaziun per laschar offrir ün stüdi da realisabilità da l’infrastructura publica in Cul (Machbarkeitsstudie). I s’ha decis d’invidar a trais büros d’indschegner da fabrica per inoltrar lur offerta.

Nouva sarinera Brail – surdatta da lavurs

La suprastanza cumünala ha surdat las lavurs per catramar la via d’access fin pro la sarinera nouva da Brail a la firma Hew AG a Zernez.

Sanaziun via da god Selva – surdatta da lavurs

Las lavurs d’impresari e la furniziun da material per la sanaziun da la via da god Selva a Zernez sun gnüdas surdattas a la cumünanza da lavur (ARGE) Costa AG a Puntraschigna e Bagger Cello GmbH a Zernez.

Via dal Pass dal Fuorn – surdatta da lavurs per las masüras da prevenziun pro las piazzas da parcar

Las piazzas da parcar aint il Parc Naziunal Svizzer PNS lung la via dal Pass dal Fuorn nu correspuondan a las pretaisas da sgürezza. Las lavurs per realisar quistas masüras da prevenziun sun gnüdas surdattas a la firma Foffa + Conrad SA a Zernez.